

17. marts 2015

Uunga siunnersuut: Nunami sumiiffinni immikkut toqqakkani takornariartitsinermik inuussutissarsiornissamut akuersissuteqartarneq pillugu inatsisartut inatsisaata nr. 19, 3. december 2012-imeersup allanngortinneqarnissaa pillugu Inatsisartut inatsisaat nr. xx, xx. Xxxx-imeersaq.

(Inuussutissarsiornermut, Suliffeqarnermut, Niuernermut Nunanullu allanut Naalakkersuisoq)

Simumiit inatsisissatut siunnersuut ima oqaaseqarfigissavarput:

Takornariaqarneq inuussutissarsiutit sukarsuit ilaattut ineriartortinneqartoq nunatta aningaasaqarne-ranut annertunerusumik isaatitsiviunissaa takonarissallu nunatsinni unnuisarnerisa annertusarneqar-nissaa Siumumit anguniagaraarput.

Inatsisissatut siunnersuummi anguniarneqartoq ilaatigut suliassaqaqarfinnik aammalu takornariartitsi-sartut qinnuteqartarnerannut oqilisaassisussaanera Siumumit taperserparput.

Siumumiit iluarisimaarparput Kalaallit Nunaanni nunaqavissut sumiiffinni kisermaassilluni aalisar-titsiffiusinnaasuni Naalakkesuisunit inatsimmi qulakkeerneqarmat mattunneqannginnissaat, Siumu-miimmi pingaartipparput qangaaniilli ilaqtariit ileqquinnik kinguaariaat eqalunniartarfinnik aala-jangersimasunik atuisarnerisa innarlerneqannginnissaat. Aammalu aalajangersakkat uumasuuteqar-nermik nunalerinermillu inuussutissarsiuteqartunut akornusiisuunnginnissaat qulakkeerneqassasoq.

Siumumiit sakkortuumik kissaatigissavarput akuersissuteqarluni Eqalunnik aalisartitsisarnissani Kalaallit qangarsuaaniilli piniariaasiat aammalu kuummik atueriaasiat, pinngortitamik mianerinnit-tumik aammalu mingutsitsinnngitsumik piniartitsisoqartarnissaa ilanngullugit inatsisitigut qulakkeer-lugit, pingaartumik eqaluit mingutsitaanermik malissajasuunerat eqqarsaatigalugu.

Inatsisitigut qulakkeerneqartariaqarpoq sutigut tamatigut nuannariinnarlugu aalisarnermik aalisartit-sisartup najukkami akuersissuteqarfiusumi eriaGINNILLUNI aammalu eqqiluisaarluni ingerlatsinissaa.

Siumumit nuannaarutigaarput inatsisit imminnut kalluaqqasut marluk, ataatsimoortinneqalermata. Tassani anguneqassamat suliat eqaannerusumik aammalu pisariunngittumik ingerlanneqartaler-nissaat, taamaalilluni qinnuteqarnermi marloqiusamik ingerlatsisoqannginnissaa anguneqassamat.

Siumumiit taama oqaaseqarluta siunnersuut Ataatsimiitsitaliamut susassaqtumut peqqissaarullugu suliarineqarnissaa inassutigaa.

Ineqi Kielsen

Siumut